



● НЫСАН

АУЫЛ ҚАУІПСІЗДІГІ КҮШЕЙДІ

ЖАҢА ЖЫЛ МЕРЕКЕСІ
ҚАРСАҢЫНДА
АУДАНЫМЫЗДАҒЫ
АУЫЛ ТҮРҒЫНДАРЫ-
НЫҢ ҚАУІПСІЗДІГІН
АРТТЫРУҒА
БАҒЫТТАЛҒАН
БІРҚАТАР МАҢЫЗДЫ
НЫСАНДАР
ПАЙДАЛАНУҒА БЕРІЛІП,
АУЫЛ КӨШЕЛЕРІНЕ
ОТАН СОҒЫСЫ
АРДАҒЕРЛЕРІНІҢ ЕСІМІ
БЕРІЛДІ.



Сайөтес, Ұштаған және Қызыан ауылдарында өрт сөндіру пункттерінің ашылуы төтенше жағдайлардың алдын алуға және өрт кезінде жедел әрекет етуге мүмкіндік береді. Сайөтес пен Ұштаған ауылдарында ашылған өрт сөндіру пункттерінің салтанатты ашылу шараларына Қазақстан Республикасы төтенше жағдайлар министрлігі өртке қарсы қызмет комитетінің төрағасы Ерлан Төрегелдиев, облыстық Төтенше жағдайлар департаментінің бастығы Мұрат Мұханов, аудан әкімі Ғалымжан Ниязов, сала мамандары мен ауыл тұрғындары қатысты. Жаңа нысандар заманауи техникамен және қажетті құрал-жабдықтармен толық қамтылған. Өрт сөндіру пункттерінде арнайы дайындықтан өткен қызметкерлер тәулік бойы кезекшілік атқаратын болады.

Сайөтес ауылындағы өрт сөндіру пункті 10 бірлік штатпен қамтылып, оның құрамында командир, өрт сөндірушілер, диспетчерлер мен жүргізушілер бар. Бұл ауыл аумағындағы өрт қауіпсіздігін күшейтіп, тұрғындардың тыныштығын қамтамасыз етуге бағытталған.

Сондай-ақ Сайөтес ауылында Отан соғысының ардагері Ләтіп Қуанышевтің есімі көшелердің біріне берілді. Ел қорғау жолында ерлік көрсеткен, соғыстан кейінгі жылдары ауыл шаруашылығының дамуына үлес қосқан ардагерге көрсетілген бұл құрмет – тарихи жадыны сақтау мен жас ұрпақты отансүйгіштікке тәрбиелеудің жарқын көрінісі.



Қызыан ауылында ашылған өрт сөндіру пункті де ауыл халқының қауіпсіздігін арттыруға бағытталған. Ашылу салтанатында аудан әкімі Ғалымжан Ниязов жаңа нысанның маңыздылығын атап өтіп, оның төтенше жағдайлардың алдын алу мен жедел әрекет етудегі рөліне тоқталды. Пункт заманауи талаптарға сай жабдықталып, өртке қарсы техникалармен қамтамасыз етілген.

Айта кету керек, ауданда бұған дейін Тұщықұдық ауылында өрт сөндіру пункті ашылған болатын. Бұл елді мекендерге басымдық берілуінің басты себебі Тұщықұдық пен Ұштаған аумақтарындағы жасыл белдеу және қыр үстінде орналасқан Сайөтес ауылын өрт қаупі жоғары жайылымдық аймаққа жатқызу. Облыстық төтенше жағдайлар департаменті басшысының орынбасары Мирбек Қараев өрттің алдын алу және төтенше жағдайларға жедел әрекет ету бағытындағы жұмыстар алдағы уақытта да кезек-кезеңімен жалғасатынын жеткізді.

Аталған өрт сөндіру пункттері ауылдық елді мекендердегі қауіпсіздік деңгейін арттырып, тұрғындардың бейбіт өмір сүруіне берік негіз қалыптастырып отыр.

Е.ЖҰМАҒҰЛОВА.

● МЕРЕКЕ

ЕРЕКШЕ БАЛАЛАРҒА – ЕРЕКШЕ ҚУАНЫШ

ӘР БАЛА ҮШІН ҚУАНЫШ ПЕН ШАТТЫҚҚА ТОЛЫ УАҚЫТ ЖАҢА ЖЫЛ МЕРЕКЕСІ. АУДАНЫМЫЗДА ЕРЕКШЕ БІЛІМ БЕРУДІ ҚАЖЕТ ЕТЕТІН БАЛАЛАРҒА, АУДАНДЫҚ ЖАСТАР РЕСУРСТЫҚ ОРТАЛЫҒЫ МЕН ШЕТПЕ ПЕДАГОГИКАЛЫҚ-ПСИХОЛОГИЯЛЫҚ ТҮЗЕТУ КАБИНЕТІНІҢ БІРЛЕСУІМЕН ЖАҢА ЖЫЛДЫҚ МЕРЕКЕЛІК ШЫРША ҰЙЫМДАСТЫРЫЛДЫ.

Мерекелік кешке ауылдардан жүзге жуық ерекше бала жиналып, ертегі әлеміндей безендірілген шырша маңында шаттыққа бөленді. Балалардың жүзінен қуаныш пен күлкі көрініс тауып, мерекелік көңіл күй айқын сезілді. Шараның негізгі мақсаты – балаларға мейірім мен жылулық сыйлап, жаңа жылды көтеріңкі рухпен қарсы алуға жағдай жасау болды.

Кеш барысында аудан әкімінің орынбасары Маралбек Сейлов сөз сөйлеп, балаларды аудан әкімі атынан Жаңа жыл мерекесімен құттықтады. Ол бүлдіршіндерге зор денсаулық, бақыт пен шаттық тіледі.

Бағдарлама аясында балаларға түрлі сыйлықтар табысталып, ойын-сауық көріністері мен ертегі кейіпкерлерінің қатысуымен қойылымдар ұсынылды. Әсем ән мен көңілді билер мерекенің сәнін арттырып, балалар өз қуаныштарын еркін жеткізді.

Балалардың бал бұл жанған жүзі мен шат күлкісі кештің шынайы нәтижесін айқындады. Мерекелік шырша ерекше балалар үшін ұмытылмас әсер қалдырып, жаңа жылға деген сенім мен қуаныш сыйлады.

ҒАЖАЙЫП КЕШ

АУДАНЫМЫЗДА ДӘСТҮРЛІ АУДАН ӘКІМІНІҢ ЖАҢА ЖЫЛДЫҚ ШЫРШАСЫ ҰЙЫМДАСТЫРЫЛДЫ. МЕРЕКЕГЕ АУДАННАН 100 БАЛА ҚАТЫСЫП, ОЛАР КӨҢІЛДІ ШАРАҒА КҮӘ БОЛДЫ.



Кеште аудан әкімі Ғалымжан Ниязов балаларды құттықтап, жылы лебізін білдірді:

«Балалар – еліміздің болашағы. Мемлекет басшысы балаларды қолдауға ерекше көңіл бөліп келеді. Елімізде сіздердің білім алуыңызға, дені сау ұрпақ боп қалыптасуыңызға барлық жағдай жасалған. Жаңа жыл мерекесі құтты болсын, баршаңызға бақыт, денсаулық, жетістік тілеймін», – деді.



Шара барысында балаларға арналған түрлі ойындар, концерттік қойылымдар мен шырша айналасында қызықты іс-шаралар өткізілді. Қатысушыларға тәттілер мен ақшалай сыйлықтар табысталды.

Сонымен қатар, аудан әкімі Жаңа жыл мерекесі қарсаңында мүмкіндігі шектеулі балалармен дастархан басында кездесіп, әр баланың мерекелік қуанышқа бірдей бөленуіне мән берудің маңыздылығын айтты.

Ауданда ұйымдастырылған мереке балаларға көтеріңкі көңіл-күй сыйлап, жаңа жылды қуанышқа толы бастауға мүмкіндік берді.

ӨЗ ТІЛШІМІЗ.





● МЕРЕЙ

ӨНЕР МЕН МӘДЕНИЕТ – ҰЛТ
РУХАНИЯТЫНЫҢ ӨЗЕГІ. ӨНІРДІҢ МӘДЕНИ
ӨМІРІН БАЙЫТЫП, ШЫҒАРМАШЫЛ
ЖАНДАРДЫҢ ЕҢБЕГІН ҰЛЫҚТАУҒА
АРНАЛҒАН ТАҒЫЛЫМДЫ ШАРАЛАР ЖҮЙЕЛІ
ҰЙЫМДАСТЫРЫЛЫП КЕЛЕДІ. СОНЫҢ
АЙҚЫН КӨРІНІСІ – АУДАНДЫҚ МӘДЕНИЕТ
ҮЙІНДЕ ӨТКЕН МӘДЕНИЕТ САЛАСЫНЫҢ
ҮЗДІГІ, АҚЫН, САЗГЕР КӨМЕК ЫБЫРАЕВТЫҢ
ШЫҒАРМАШЫЛЫҒЫНА АРНАЛҒАН «ӨНЕРГЕ
ТАҒЫМ – ТАЛАНТҚА ҚҰРМЕТ» КЕШІ ЕДІ.



ӨНЕРГЕ ТАҒЫМ – ТАЛАНТҚА ҚҰРМЕТ

Бұл игі басқосу ең алдымен өнерге адал қызмет етіп, шығармашылығымен ел жүрегінен орын алған талант иелеріне деген құрмет. Аудан әкімі Ғалымжан Ниязов қатысып, сазгер Көмек Ыбыраевқа ақжарма тілегін айтып, шығармашылық табыс пен тың туындылар тіледі.

Шара барысында Қ.Ыбыраевтың шығармашылығына ерекше назар аударылды. Өнер жолында өзіндік қолтаңбасын қалыптастырған

сазгердің елге кеңінен танылған әндері сахна төрінде орындалып, оның шығармашылық мұрасы жан-жақты дәріптелді. Ақынның жүректен шыққан өлеңдері мен әуезді әндері көрермендерге терең әсер сыйлап, ұлттық өнердің қадір-қасиетін айшықтай түсті.

Мұнан соң аудан әкімі Ғ.Ниязов облыстық «Маңғыстау жұлдыздары» өнер фестивалінде бас жүлде иеленген аудандық мәдениет және өнер саласының үздіктерін марапаттады. Бұл сәт

сахна төріндегі шығармашыл жандар үшін үлкен мәртебе әрі зор қуаныш болды.

Салтанатты кешке аудан басшылығы, мәдениет қызметкерлері, өнер жанашырлары мен ауыл тұрғындары қатысып, өнер иелеріне шынайы ықыластарын білдірді. Жылы лебіздер мен әсем әуенге толы бұл шара өнерге тағым мен талантқа құрметтің жарқын көрінісі ретінде көпшіліктің есінде қалды.

АУДАНДА СПОРТ СА-
ЛАСЫНДА АЙРЫҚША
ТАБЫСҚА ЖЕТКЕН
ҮЗДІК СПОРТШЫЛАР-
ДЫ МАРАПАТТАУҒА
АРНАЛҒАН САЛТАНАТТЫ
ЖИЫН ӨТТІ. БҮЛ ШАРА
ЖЫЛ БОЙЫ ҚАЖЫРЛЫ
ЕҢБЕК ЕТІП, ЕЛ НАМЫСЫН
АБЫРОЙМЕН ҚОРҒАҒАН
СПОРТШЫЛАРҒА ҚҰРМЕТ
КӨРСЕТУДІҢ ЖАРҚЫН
ҮЛГІСІНЕ АЙНАЛДЫ.

СПОРТ САЛАСЫНЫҢ ҮЗДІКТЕРІ

Марапаттау рәсімінде Қазақстан Азия, Әлем чемпионаттарында, жоғары нәтиже көрсетіп, жүлделі орындардан көрінген спортшылар мен жаттықтырушыларға ерекше ілтипат білдірілді. Аудан спортының дамуына үлес қосқан азаматтардың еңбегі еленіп, жетістіктері насихатталды.

Салтанатты жиында аудан әкімі Ғалымжан Ниязов сөз сөйлеп, спорттың қоғам өміріндегі маңызын атап өтті. Ол өз сөзінде «қай елдің де өркениеті әдебиетімен, мәдениетімен, спортымен өлшенетінін» айтып, осы салаға қатысты спортшылардың жетістіктеріне арнайы тоқталды. Аудан халқының 47,5 пайызы бұқаралық спортпен тұрақты түрде айналысатыны және инфрақұрылымды дамыту бағытында атқарылған жұмыстарды да тілге тиек етті.

Жыл ішінде Ш.Бөлтекұлы атындағы аудандық балалар мен жасөспірімдер спорт мектебіне күрделі жөндеу жүргізіліп, ұзақ уақыт пайдаланусыз тұрған жүзу бассейні қайта қалыпқа келтірілді. Сонымен қатар аталған мектептің Сайөтес ауылындағы спорт залына да жөндеу жұмыстары жоспарланған. Ауылдарда 15 ашық спорт алаңы, 14 балалар ойын алаңы және 14 воркаут алаңы салынды. Тұщықұдық, Шебір, Ақшымырау, Шайыр ауылдарында демеушілердің қолдауымен бой көтерген, бұған дейін мектептер балансында болған спорт нысандары облыстық спорт басқармасының теңгеріміне беріліп, жаттықтырушылар штатымен толық қамтылды. Бұл жұмыстар ауыл балаларының спортқа

кеңінен тартылуына және болашақта танымал спортшылардың қалыптасуына үлкен мүмкіндік беріп отыр.

Аудан спортшыларының халықаралық және республикалық деңгейдегі жетістіктері де ерекше аталды. Биыл Әлем кубогінен 1 алтын, Евразия кубогінен 2 алтын мен 4 күміс, Азия кубогінен 2 қола медаль жеңіп алынды. Әлем чемпионатында 2 алтын, 4 күміс, 4 қола, Азия чемпионатында 3 алтын, 2 күміс, 18 қола, ал Қазақстан Республикасының чемпионаттарында 5 алтын, 10 күміс, 18 қола медаль еншіленді. Қазіргі таңда ауданда 89 спортшы Қазақстан Республикасының спорт шеберлігіне үміткер ретінде тіркелген.

«Біздің аудан өзінің бай спорт тарихымен әрдайым мақтанады. Алдағы жылқы жылында да жағымды жаңалықтарымыз көп болсын», – деп түйіндеді аудан әкімі.

Марапаттау шарасы аудан өнерпаздары Айгүл Құбаш пен Бауыржан Ретбаевтың мерекелік концертімен жалғасты. Кеш көрермендерге көтеріңкі көңіл күй сыйлап, спорт пен өнердің үйлесім тапқан тағылымды мерекесіне айналды.



ЖАРМЫШ АУЫЛЫНДА «ЖЫЛ ҮЗДІГІ – 2025» САЛТАНАТТЫ ШАРА ӨТІП, АУЫЛДЫҢ ҚОҒАМДЫҚ-ӘЛЕУМЕТТІК ӨМІРІНДЕ БЕЛСЕНДІЛІК ТАНЫТЫП, ӘР САЛАДА АДАЛ ЕҢБЕГІМЕН, ЖАУАПКЕРШІЛІГІМЕН ЖӘНЕ КӘСІБИ БІЛІКТІЛІГІМЕН ЕРЕКШЕЛЕНГЕН АЗАМАТТАР МАРАПАТТАЛДЫ.



ТАБЫСТЫ ЕҢБЕК ИЕЛЕРІ

Салтанатты жиында ауыл әкімі З.Әнуаров ауыл тұрғындарын жаңа жыл мерекесімен құттықтап, елдің дамуы ең алдымен қарапайым еңбек адамдарының табанды еңбегіне тікелей байланысты екенін атап өтті. Сондай-ақ биылғы Жұмысшы мамандықтар жылы аясында жұмысшы кәсібінің беделін арттыру мен ауыл тұрғындарының еңбегін бағалау басты міндеттердің бірі екенін жеткізді. Осы ретте жыл қорытындысы бойынша ауыл өмірінің әр саласында жемісті еңбек етіп жүрген азаматтарға құрмет көрсетілді.

Еңбегі еленгендердің қатарында Жаңабай Әуелбаев пен Сдик Абуов та бар. Сонымен қатар «Жыл мейіркесі» аталымы – Сагира Дербисалинаға, «Жыл коммуналдық қызметкері» – Саят Сериковке, «Жыл спортшысы» – Мұңалбай Мухановқа, «Жыл мәдениет қызметкері» – Айнұр Таңатароваға, «Жыл жұмысшы маманы» – Мереке Естүрковқа, «Жыл мұғалімі» – Забира Мырзабаеваға және «Жыл тәрбиешісі» номинациялары Гүлзат Жаулыбаеваға табысталды. Аталған азаматтардың әрқайсысы өз саласында үлгілі еңбек етіп, ауылдың дамуына өзіндік үлес қосып келеді.

Марапаттау рәсімінен кейін мерекелік кеш концерттік бағдарламамен жалғасып, өнерпаздар ән-жырдан шашу шашты. Ауыл тұрғындары үшін бұл кеш жылы жүздесулер мен көтеріңкі көңіл күй сыйлаған тағылымды шараға айналды.

Бетті дайындаған Е.ЖУМАҒҰЛОВА, М.ЖЕБЕКҰЛЫ



ЖОБА

МАҢҒЫСТАУДА МӘСҚ ТӨЛЕМДЕРІ АРТЫП КЕЛЕДІ

МЕМЛЕКЕТТІК ӘЛЕУМЕТТІК САҚТАНДЫРУ ҚОРЫ (МӘСҚ) ҚАЗАҚСТАН РЕСПУБЛИКАСЫНЫҢ ӘЛЕУМЕТТІК КОДЕКСІНДЕ КӨЗДЕЛГЕН ӘЛЕУМЕТТІК ҚАТЕРЛЕР ТУЫНДАҒАН КЕЗДЕ 2005 ЖЫЛДАН БАСТАП ЖҰМЫС ІСТЕЙТІН АЗАМАТТАРДЫ ӘЛЕУМЕТТІК ҚАМСЫЗДАНДЫРУДЫҢ ҚОСЫМША ДЕҢГЕЙІН ІСКЕ АСЫРАДЫ.

Міндетті әлеуметтік сақтандыру жүйесінің қаржы ресурстары төлеушілер, яғни жұмыс берушілер қызметкерлері үшін, жеке кәсіпкерлер және жеке практикамен айналысатын адамдар өзі үшін және басқалар төлейтін әлеуметтік аударымдар есебінен қалыптастырылады. 1 қаңтардан бастап міндетті әлеуметтік сақтандыру жүйесіне қатысушылар үшін әлеуметтік аударымдар мөлшерлемесі 5%-ды құрайды. Жүйеге нысаналы жұмыстарды орындау (қызметтерді көрсету) болып табылатын азаматтық-құқықтық сипаттағы шарттар бойынша кіріс алатын жеке тұлғалар кірді. 2026 жылдан бастап жүйеге Қазақстан Республикасының Салық кодексіне көзделген шарттарға сәйкес келетін жеке тұлғалар танылатын өзін-өзі жұмыспен қамтығандар үшін арнайы салық режимін (бұдан әрі - АСР) қолданатын адамдар кіреді. Өзін-өзі жұмыспен қамтығандар үшін АСР қолданатын жеке тұлғалардың осы режим шеңберінде қызметті жүзеге асырған есепті айда алған кірісі олар үшін әлеуметтік аударымдарды есептеу объектісі болып табылады. Өзін-өзі жұмыспен қамтығандар үшін АСР қолданатын жеке тұлғалардың төлеуіне жататын әлеуметтік аударымдар мөлшерлемесі әлеуметтік аударымдарды есептеу объектісінің 1% мөлшерінде белгіленеді. Бұл ретте әлеуметтік аударымдарды есептеу үшін алынатын кіріс республикалық бюджет туралы заңда тиісті қаржы жылына белгіленген ең төмен жалақының 7 еселенген мөлшерінен және Қазақстан Республикасының Салық кодексіне сәйкес өзін-өзі жұмыспен қамтығандар үшін АСР қолдану үшін белгіленген шектен аспауға тиіс. Республика бойынша міндетті әлеуметтік сақтандыру жүйесіне шамамен 6,9 млн. жұмыс істейтін азамат қатысады және 1,3 млн. астам адам жыл бойы МӘСҚ-дан әлеуметтік төлемдер алады. Жүйе МӘСҚ-тан екі ұзақ мерзімді әлеуметтік төлемді көздейді - қызметкер жалпы еңбекке қабілеттілігінен айырылған жағдайда, сондай-ақ оқпайтын болған жағдайда – оның асырауында болған

отбасы мүшелеріне тағайындалатын асыраушысынан айырылу жағдайына әлеуметтік төлем алады. Бұл төлемдер мүгедектігі бойынша және асыраушысынан айырылу бойынша бюджет қаражаты есебінен базалық мемлекеттік әлеуметтік жәрдемақыларға қосымша жүзеге асырылады. Ұзақ мерзімді әлеуметтік төлемдер Қазақстан Республикасы Үкіметінің шешімі бойынша жыл сайын арттырылып отыратынын атап өту қажет. 2026 жылғы 1 қаңтардан бастап аталған төлемдер 10% -ға арттырылады. Маңғыстау облысы бойынша 5 661 мың еңбекке қабілеттілігінен айрылған және 3 445 мың асыраушысынан айрылған отбасы үшін әлеуметтік төлемдер автоматты режимде арттырылады. Өңірде 2025 жылы 11 айда 5 661 адам еңбекке қабілеттілігінен айырылғаны үшін 3 595,9 млн. теңге, асыраушысынан айырылғаны үшін 3 445 отбасы 3 162,4 млн. теңге көлемінде әлеуметтік төлем алды. Келесі екі әлеуметтік төлем ана мен балалық шақпен байланысты. Осылайша, жұмыс істейтін әйел кірісінен айырылған кезеңде жүктілікке және босануға байланысты, сондай-ақ бір жарым жасқа дейінгі баланың күтіміне байланысты әлеуметтік төлемдер алады. 2025 жылы 11 айда өңірде 10 129 болашақ ана жалпы сомасы 16 774,4 млн. теңгеге жүктілікке және босануға байланысты әлеуметтік төлем алды, ал бала күтімі бойынша 32 737 адам жалпы сомасы 26 758,3 млн. теңгеге әлеуметтік төлем алды. Мансап орталығы жұмыссыз ретінде тіркеген жағдайда жұмыстан шығу себептеріне қарамастан, тағайындалатын жұмысынан айырылу жағдайына әлеуметтік төлем жүйеге қатысушы үшін маңызды қолдау болып табылады. Маңғыстау облысында 2025 жылдың 11 айда 16 209 адам жалпы сомасы 5 040,0 млн. теңгеге аталған төлемді алды. Осылайша, 2025 жылғы 1 желтоқсандағы жағдай бойынша МӘСҚ-тан Маңғыстау облысы бойынша 55 330,9 млн. астам теңге төленді. Әлеуметтік қатер туындаған кезде әлеуметтік төлемдердің мөлшері әр қатысушыға жеке есептелетінін және МӘСҚ-ға әлеуметтік аударымдардың уақтылы мен толық төленуіне тікелей байланысты екенін атап өткен жөн. Осыған байланысты жұмыс істейтін азаматтар үшін МӘСҚ-ға түскен әлеуметтік аударымдар сомасын тұрақты негізде тексеру маңызды. Бұл бүгінде egov.kz электрондық үкімет порталы немесе екінші деңгейлі банктердің мобильдік қосымшалары арқылы онлайн режимде, сондай-ақ «Азаматтарға арналған үкімет» мемлекеттік корпорациясының бөлімшелері немесе МӘСҚ филиалдары арқылы офлайн режимде қолжетімді. Әлеуметтік төлемдерді тағайындау бойынша мемлекеттік қызметтерді

көрсету кезінде барлық қажетті мәліметтер мемлекеттік органдар мен ұйымдардың ақпараттық жүйелерінен сұратылады. Осылайша, тиісті төлемдерді алу үшін үйден шықпай-ақ, қағаз жүзіндегі құжаттарсыз онлайн режимде жүгінуге болады. 2025 жылдың 11 айдағы қорытындысы бойынша МӘСҚ ұсынған электрондық форматтағы мемлекеттік қызметтердің үлесі 70%-дан асты. Бұдан басқа, 2025 жылы 15 қазаннан бастап әлеуметтік төлемдерді автоматты түрде тағайындау жөніндегі пилоттық жоба іске қосылды, оның негізгі мақсаты мемлекеттік қызметтерді көрсету мерзімін бір жұмыс күніне дейін қысқарту және әлеуметтік төлемдерді тағайындаудың негізгі кезеңдерін оңтайландыру есебінен процестердің ашықтығын арттыру болып табылады. Жоба egov.kz электрондық үкімет порталы, enbek.kz электрондық еңбек биржасы, екінші деңгейлі банктердің мобильдік қосымшалары мен проактив арқылы келіп түскен өтініштер негізінде қалыптастырылатын электрондық іс мәкetterін қамтиды. Электрондық өтініштер мемлекеттік органдардың ақпараттық жүйелерінде кешенді тексеруден өтеді. Жүйе төлемдерді алу құқығының басталғанын, әлеуметтік аударымдарды уақтылы және дұрыс төлеуді, сондай-ақ құжаттардың толық топтамасының болуын автоматты түрде растайды. Егер өтініш белгіленген критерийлерге сәйкес келсе, шешім автоматты түрде қабылданады, содан кейін өтініш берушіге SMS-хабарлама жіберіледі. Жүйеде қандай да бір сәйкессіздіктер анықталған жағдайда, электрондық іс мәкеті автоматты түрде МӘСҚ филиалдары мамандарының қарауына беріледі. Пилоттық жоба әлеуметтік төлемдерді тағайындау туралы ғана емес, тағайындаудан бастарту, төлем мөлшерін қайта есептеу, тоқтата тұру және тоқтату туралы шешімдерді автоматты түрде қабылдауды көздейтінін атап өткен жөн. Екі ай ішінде жүйе Маңғыстау облысы бойынша 33 743 өтінішті қарады, оның ішінде 17 284 бойынша автоматты режимде оң шешімдер қабылданды. Сондай-ақ, МӘСҚ міндетті әлеуметтік сақтандыру жүйесі бойынша консультативтік-түсіндіру жұмыстарын жүргізуде. 11 айдың қорытындысы бойынша Маңғыстау облысында еңбек ұжымдары және халықпен 112 іс-шара, 2 «Ашық есік күні» іс-шаралары өткізіліп, жеке және заңды тұлғалардан келіп түсетін 823 өтініштері қаралды. Жалпы МӘСҚ-тың негізгі міндеті әлеуметтік тәуекелдер туындаған кезде әлеуметтік төлемдердің әділ мөлшерін алу мақсатында халықты жұмыспен қамтуды ынталандыру, сондай-ақ көрсетілетін мемлекеттік қызметтердің сапасы мен қолжетімділігін арттыру болып табылады.

● ЖИЫН

МАҢЫЗДЫ ШЕШІМДЕР ҚАБЫЛДАНДЫ

ЖУЫРДА АУДАН ӘКІМДІГІНДЕ МӘСЛИХАТТЫҢ КЕЗЕКТІ ЖИЫРМА ТӨРТІНШІ СЕССИЯСЫ ӨТТІ. ЖИЫНҒА АУДАН ӘКІМІ ҒАЛЫМЖАН НИЯЗОВ, МӘСЛИХАТ ДЕПУТАТТАРЫ, БӨЛІМ ЖӘНЕ МЕКЕМЕ БАСШЫЛАРЫ ҚАТЫСТЫ. СЕССИЯ БАРЫСЫНДА АУДАННЫҢ АЛДАҒЫ ДАМУ БАҒЫТЫН АЙҚЫНДАЙТЫН БІРҚАТАР МАҢЫЗДЫ МӘСЕЛЕЛЕР ҚАРАЛЫП, ТИІСТІ ШЕШІМДЕР ҚАБЫЛДАНДЫ.

Күн тәртібіндегі мәселелер бойынша жауапты сала басшылары баяндама жасап, депутаттар тарапынан ұсыныс-пікірлер айтылды. Әрбір мәселе жан-жақты талқыланып, ашық дауыс беру арқылы шешім қабылданды. Сессияда 2026–2028 жылдарға арналған аудандық бюджетті бекіту, мәслихаттың 2026 жылға арналған жұмыс жоспар, мәслихат аппаратының құрылымы және оны ұстауға әрі материалдық-техникалық жағынан қамтамасыз етуге арналған шығыстарды айқындау, ауданның 2026–2030 жылдарға арналған даму жоспары, аудан мәслихатының 2024 жылғы 23 желтоқсандағы №17/126 «2025–2027 жылдарға арналған аудандық бюджет туралы» шешіміне өзгерістер енгізу, ауданда оңайлатылған декларация негізінде арнайы салық режимі бойынша салықтарды есептеу кезіндегі мөлшерлемесін төмендету туралы мәселелер қаралды. Аталған мәселелер бойынша аудандық экономика және қаржы бөлімінің басшысы Орынғали Күзембаев баяндама жасап, жоспарланған көрсеткіштер мен қаржыландыру бағыттарына тоқталды. Депутаттар тарапынан қойылған сұрақтарға нақты жауаптар беріліп, ұсыныстар ескерілді. Сессия жұмысына қатысқан аудан әкімі Ғалымжан Ниязов қабылданған шешімдердің ауданның әлеуметтік-экономикалық дамуына серпін беретінін атап өтті. Сонымен қатар, тиісті бөлім басшыларына бекітілген жоспарлар мен тапсырмалардың уақтылы әрі сапалы орындалуын бақылауға алу қажеттігін тапсырды.

ӨЗ ТІЛШІМІЗ.

ҚАРЖЫ ТӘРТІБІ КҮШЕЙТІЛУДЕ

Қаржылық тәртіпті сақтау және бюджет қаражатын тиімді пайдалану – мемлекеттік басқарудың маңызды бағыттарының бірі. Осы мақсатта Маңғыстау облысы бойынша тексеру комиссиясының бастамасымен аудан әкімдігінде қаржылық бұзушылықтардың алдын алу және болдырмауға арналған ақпараттық-түсіндіру жиыны өтті. Жиынға аудан әкімінің орынбасары Талғат Алтынғалиев төрағалық етіп, аудандық деңгейдегі бюджеттік бағдарлама әкімшілері мен мекемелердің есепшілері қатысты. Кездесу барысында тексеру комиссиясының өкілі Бекболат Қорбақов төртінші деңгейлі бюджеттің атқарылуы, мемлекеттік қаржыны басқару және активтерді пайдалану тиімділігі бойынша жүргізілген аудиторлық іс-шаралардың нәтижелерін баяндап берді. Спикер қаржы тәртібін бұзуға жні себеп болатын факторларды атап өтіп, бюджеттік жоспарлау мен орындау барысында жіберілетін негізгі қателіктерге кеңінен тоқталды. Сонымен қатар жиында мемлекеттік қаражатты тиімді әрі мақсатты пайдалану жолдары, қолданыстағы заңнамалық талаптар және қаржылық есептілікті дұрыс жүргізу мәселелері жан-жақты түсіндірілді. Қатысушылар тарапынан қойылған сұрақтарға нақты жауаптар беріліп, тәжірибеде қолдануға болатын ұсыныстар айтылды. Аталған ақпараттық-түсіндіру жиыны алдағы уақытта да қаржылық тәртіпті нығайтуға, бюджеттік қаражаттың тиімді әрі ашық пайдаланылуын қамтамасыз етуге оң ықпал етпек.

Е.ЖУМАҒҰЛОВА.

ҚОҒАМДЫҚ ТЫҢДАУ

«Кен-Сары» ЖШС «Арыстан кен орнының №322 және №216 ұңғымаларын жаңғырту», «Арыстан кен орнының мұнайды дайындау қондырғысы» объектісіндегі мұнайды жылыту пештеріндегі автоматты өрт сөндіру жүйесі», «Арыстан кен орнының вахталық кентті кеңейту 1 және 2 кезең» және «Арыстан кен орнының №603, 607, 608, 609, 611, 612, 613, 614, 615, 616 ұңғымаларды жайластыру және алаңдар мен жолдар салу» жобасына ҚОҚБ және Табиғатты қорғау іс шаралары жоспары бойынша қоғамдық тыңдаулар өткізетінін хабарлайды. Қоғамдық тыңдау **2026 жылы 12 ақпан сағат 11:00-де өтеді.**
Өткізу орны: Маңғыстау облысы, Сайотес ауылы, Мәдениет үйінің ғимараты. Учаскенің географиялық координаттары және әсер ету аумағының **географиялық координаттары:** 44°42'21.5644"С, 54°12'36.24" В; 44°44'08.5325"С, 54°08'29.2928" В; 44°42'42.60"С, 54°10'41.30" В; 44°42'42.10"С, 54°10'41.01" В; 44°42'42.29"С, 54°10'42.40" В; 44°42'41.78"С, 54°10'42.07" В;
Онлайн қосылымға сілтеме: <https://us05web.zoom.us/j/83318231888?pwd=LA4h6j8JO1atHaxvM9Fbi3iaUTiSB6.1>
Конференция идентификаторы 833 1823 1888. **Кіру коды:** sBPe8A
Тапсырыс беруші: «Кен-Сары» ЖШС, 17 мкр., з/д. 39, тел:8(7292)202021. БИН 010740000600
Жобаны әзірлеуші: «KJS Project & Consulting» ЖШС, тел: +7 (7292) 55 00 53.
Эл.пошта: kjs_project@inbox.ru.
Жергілікті атқарушы орган: «Маңғыстау облысының табиғи ресурстар және табиғат пайдалануды реттеу басқармасы» ММ, жауапты тұлға Сабина Базарбай, **эл. пошта:** s.bazarbay@mangystau.gov.kz., тел: 8(7292) 43-10-88; Жобалық құжаттама БЭП <https://ndbecology.gov.kz/>, сайттыңда орналастырылған.

ОБЩЕСТВЕННЫЕ СЛУШАНИЯ

ОО «Кен-Сары» объявляет, что проводит общественные слушания по РООС к «Модернизация скважин №322 и №216 месторождения Арыстановское», «Система автоматического пожаротушения на печаш подогрева нефти на объекте «Установка подготовки нефти месторождения Арыстановское», «Расширение вахтового поселка на месторождении Арыстановское. 1 и 2 очередь» и «Строительство площадок, дорог и обустройство скважин №№603, 607, 608, 609, 611, 612, 613, 614, 615, 616 месторождения Арыстановское» и ППМ. **Слушания состоятся:** 12 февраля 2026 года в 11:00 ч.
Место проведения: Мангистауская область, село Сайотес, здание Дома культуры. Географические координаты участка и географические координаты **территории воздействия:** 44°42'21.5644"С, 54°12'36.24" В; 44°44'08.5325"С, 54°08'29.2928" В; 44°42'42.60"С, 54°10'41.30" В; 44°42'42.10"С, 54°10'41.01" В; 44°42'42.29"С, 54°10'42.40" В; 44°42'41.78"С, 54°10'42.07" В;
Ссылка на онлайн подключение: <https://us05web.zoom.us/j/83318231888?pwd=LA4h6j8JO1atHaxvM9Fbi3iaUTiSB6.1>
Идентификатор конференци 833 1823 1888. Код доступа: sBPe8A
Заказчик: ОО «Кен-Сары», г. Актау, 17 мкр., з/д. 39, тел:8(7292)202021. БИН 010740000600
Разработчик: ОО «KJS Project & Consulting», тел: +7 (7292) 55 00 53, эл.почта: kjs_project@inbox.ru.
Местный исполнительный орган: ГУ «Управление природных ресурсов и регулирования природопользования Мангистауской области», ответственное лицо Базарбай Сабина Саламатқызы, **эл.почта:** s.bazarbay@mangystau.gov.kz., тел. 8 (7292) 43-10-88; Документация по проекту размещена на сайте ЕЭП <https://ndbecology.gov.kz/>.



ҚАУІПСІЗДІК

ЕСКІ ЖЫЛҒА ӨКПЕ ЖОҚ, КЕЛЕР ЖЫЛ-ДАН ҮМІТ КӨП. ОСЫ БІР МАҒЫНАЛЫ СӨЗБЕН АРТТА ҚАЛҒАН ЖЫЛҒА КӨЗ ЖҮПІРТСЕК, ТӨТЕНШЕ ЖАҒДАЙЛАР БӨЛІМІ ҮШІН 2025 ЖЫЛ ЖАУАПКЕРШІЛІК ПЕН ТАБАНДЫЛЫҚТЫ, СЫНДАРЛЫ ЕҢБЕКТІ ТАЛАП ЕТКЕН, НАҚТЫ НӘТИЖЕЛЕРМЕН ӨРНЕКТЕЛГЕН КЕЗЕҢ БОЛДЫ. АУДАН АУМАҒЫНДА АЗАМАТТАРДЫҢ ӨМІРІ МЕН ДЕНСАУЛЫҒЫН САҚТАУ, ТАБИҒИ ЖӘНЕ ТЕХНОГЕНДІК СИПАТТАҒЫ ТӨТЕНШЕ ЖАҒДАЙЛАРДЫҢ АЛДЫН АЛУ, ОЛАРДЫҢ САЛДАРЫН БАРЫНША АЗАЙТУ – БӨЛІМ ҚЫЗМЕТІНІҢ БАСТЫ БАҒЫТЫ БОЛЫП ҚАЛА БЕРДІ.



СЫНДАРЛЫ ЖЫЛ, СЕНІМДІ ҚАДАМ



Ауданның географиялық ерекшеліктері мен климаттық жағдайлары ескеріліп, төтенше жағдайлар бөлімі қызметі қауіптің алдын алу шараларын жүйелеуге, кез келген оқиғаға жедел әрекет етуге және тұрғындардың қауіпсіздік мәдениетін қалыптастыруға бағытталды. Себебі қауіпсіздік – кездейсоқтық емес, күнделікті еңбектің нәтижесі екені баршаға аян.

2025 жылы төтенше жағдайлардың алдын алу мақсатында ақпараттық-түсіндіру және инженерлік бағыттағы кешенді жұмыстар кең ауқымда жүргізілді. Жылыту маусымы, суға түсу кезеңі және дала өрті қаупіне байланысты аудан аумағында 20-ға жуық ақпараттық билборд орнатылып, ел арасында тұрақты үгіт-насихат жұмыстары ұйымдастырылды. Жылыту маусымы қарсаңында және қазіргі таңда да тұрғындармен жүздесулер өткізіліп, өрт қауіпсіздігі талаптары жан-жақты түсіндіріліп, әрбір үй иесіне жауапкершіліктің маңызы ұғындырылды. Төтенше жағдайлардың алдын алу бағытында инфрақұрылымды нығайтуға да ерекше мән берілді. Жармыш ауылында орналасқан Сарықабак гидротехникалық құрылысы толық аяқталып, пайдалануға берілді. Аталған нысан көктемгі қарғын су мен нөсер жауын салдарынан туындауы мүмкін қауіптердің алдын алып, елді мекендердің қауіпсіздігін қамтамасыз етуге бағытталған маңызды қадам болды.



Сонымен қатар, Шетпе ауылында су жиналуға бейім алты аумақта арнайы ұңғымалар салынды. Ал Шайыр ауылында жерасты суының шамадан тыс көтерілуінен тұрғын үйлерді қорғау мақсатында дренаж жүйесі іске қосылды. Бұл жүйе 92 құдықтан тұрып, жалпы ұзындығы 3800 метрді құрайды. Аталған жұмыстар ауыл тұрғындарының тұрмыс сапасын жақсартып, қауіп-қатерді азайтуға сеп болды.

Есепті кезеңдегі айтулы жетістіктердің бірі – аудан аумағында төрт бірдей өрт сөндіру депосының салынып, ел игілігіне берілуі.

Тұщықұдық, Сайөтес, Қызан және Үшпаған ауылдарында ашылған деполар төтенше жағдай кезінде жедел әрекет ету уақытын айтарлықтай қысқартып, адам өмірін сақтауға мүмкіндік беретін маңызды нысандарға айналды. Тұщықұдық ауылындағы өрт сөндіру депосының ашылу салтанатына Қазақстан Республикасы Төтенше жағдайлар министрі, генерал-лейтенант Шыңғыс Сайранұлы Әріновтің қатысуы аталған нысанның маңызын айқындай түсті. Бұл – ауданымыздағы азаматтық қорғау жүйесін дамытуға көрсетілген жоғары деңгейдегі қолдаудың айқын көрінісі. Жыл ішінде аудан аумағында 80-ге жуық өрт, жану жағдайы және авариялық-құтқару жұмыстары тіркелді. Әрбір оқиға барысында Маңғыстау ауданы №8 өрт сөндіру бөлімінің жеке құрамы кәсіби шеберлік пен ұйымшылдық танытып, төтенше жағдайлардың асқинуына жол бермеді. Құтқарушылардың батыл қадамы мен шұғыл шешімдері талай адам өмірін аман алып қалды.

Азаматтық қорғау жүйесін одан әрі жетілдіру мақсатында тактикалық-арнайы оқу-жаттығулар тұрақты түрде өткізілді. Бұл шараларға төтенше жағдайлар бөлімімен қатар медицина, полиция, коммуналдық қызметтер және өзге де жауапты мекемелер қатысты. Шартты төтенше жағдай кезіндегі өзара іс-қимыл, халықты эвакуациялау, алғашқы медициналық көмек көрсету және апат салдарын жою мәселелері жан-жақты пысықталды. Мұндай оқу-жаттығулар нақты жағдайда жедел әрі тиімді шешім қабылдауға берік негіз қалайды. Аудандық төтенше жағдайлар бөлімі мереке және демалыс күндері де тәулік бойы кпшейтілген режимде қызмет атқарады. Құтқарушылар мен өрт сөндірушілер кез келген қауіп-қатерге әрдайым дайын. Дегенмен, қауіптің алдын алу – оны жоюдан әлдеқайда тиімді екенін әрбір тұрғын жадында ұстағаны жөн.

Жыл қорытындысы бойынша «Жыл үздігі» атағына ие болу – жеке жетістік емес, бұл – аудандық төтенше жағдайлар бөлімінің ұйымшыл ұжымының бірлескен еңбегінің нәтижесі. Осы орайда барша әріптестеріме қажырлы еңбектері мен көрсеткен қолдаулары үшін шынайы алғысымды білдіремін. Жаңа жыл әр шаңыраққа тыныштық пен тұрақтылық, амандық пен береке әкелсін. Алдағы кезеңде де халық қауіпсіздігін қамтамасыз ету жолындағы абыройлы қызметіміз өз жалғасын таба бермек.

Марғұлан ХАМЗИН,
аудандық төтенше жағдайлар
бөлімінің инженері,
азаматтық қорғау аға лейтенанты.

МҰРАГЕРІН ІЗДЕУ

Нотариус К.Мухамбеткаримова 2025 жылы 19 шілдеде қайтыс болған Шанкенов Г.Алымның мұрагерлеріне іздеу салады. Барлық мұрагерлеріне осы хабарлама шыққан күннен бастап бір ай мерзім ішінде Маңғыстау ауданы, Шетпе селосы, Орталық ш/а, Несібек-Нұр бизнес орталығында орналасқан нотариус кеңсесіне хабарласуларыңызды сұрайды.
Тел: 8 702 310 93 86.

№547

МЕНШІК ИЕСІ:

MAŃGYSTAÝ MEDIA

Директор –
Ануарбек БИМАҒАМБЕТ

Қабылдау бөлімі,
тел./факс: 20-48-34,
mangystau.media@mail.ru

ЖАҢА ӨМІР

аудандық қоғамдық-саяси газет

Газет Қазақстан Республикасы Мәдениет және ақпарат министрлігінде 6.02.2013 ж. есепке қойылып, №13356-Г куәлігі берілген.

Редактор – Айгүл РАХМЕТОВА

Тілшілер: – М.ЖЕБЕКҰЗЫ,
Е.ЖҰМАҒҰЛОВА.

Газет «Маңғыстау-Медиа» ЖШС
Ақпарат және дизайн орталығында беттелді.

Жетекші –
Гүлнара ТАСБОЛАТОВА

Бетпеуші дизайнер –
Ш.АЯЗБАЕВА. А.РАБАЕВА.

«Атырау-Ақпарат» ЖШС
баспаханасында басылды.
060005, Атырау қаласы,
Ж.Молдағалиев көшесі, 29А.
Тел: 8 7122 458-660,
586-392.



- Газет жарияланымдарындағы автор пікірі редакцияның түпкілікті көзқарасы болып есептелмейді.
- Жарияланған материалдарды сілтемесіз көшіріп басуға болмайды.
- Жарнама, хабарландырулар мазмұнына редакция жауап бермейді.
- Редакцияға жолданған материалдарға рецензия жасалмайды және қолжазба авторға қайтарылмайды.
- Тақырыптық суреттер ғаламтордан алынады.

Тапсырыс нөмірі: 0011
Таралымы: 516
Индекс: 65612
Газеттің бағасы келісімді

АҒА РАЙЫ БОЛЖАМЫ

8 қаңтар
түнде: -1 | күндіз: +1

9 қаңтар
түнде: -1 | күндіз: +2

10 қаңтар, жаңбыр
түнде: -1 | күндіз: +1

11 қаңтар
түнде: -2 | күндіз: 0

12 қаңтар, жаңбыр
түнде: -3 | күндіз: +4